

東
華
續
錄

東華續錄

咸豐八十六

臣王先謙敬編

臣陶濬宣恭校

夏四月辛丑朔諭內閣副都統伊興額以革職畱營之員經朕派令幫辦三省剿匪事宜原因其平日打仗尙能勇往是以棄瑕錄用嗣因賊擾豫疆諭令接統邱聯恩鹿邑諸軍督辦河南防剿事宜自應與在事諸臣和衷共濟奮勉圖功乃必經勝保奏參該副都統乖僻性成遇事與人齟齬商水之戰僅將另股捻匪擊退並未迎剿舞陽大股況賊止六千餘人而單銜奏報輒稱殲二萬三千餘眾既不會商恆福瑛榮又不知會傳振邦惟劣紳周光岳之言是聽以致軍心解體似此欺飾乖謬實難勝統帥之任伊興額著革去頭品頂帶以示薄懲交勝保軍營差遣委用儻再不知悛

改卽行據實嚴參周光岳並著勝保查明參奏所有河南省防剿官兵著派記名副都統吉林協領開保統帶該省防剿事宜悉歸督辦仍作爲傳振邦幫辦以期同心協力共奏膚功○諭軍機大臣等前據何桂清等會同學政奏請暫借浙江文闈舉行江南鄉試當交禮部速議具奏本日據禮部奏稱江蘇安徽兩省上屆兩科未能依限舉行伸士氣卽以回民心宜有以曲全而慰藉之請飭浙江巡撫查看情形如果事在可行卽如該督等所奏辦理如難舉行亦由該撫據實奏聞等語已依議行矣適據胡興仁奏到聲稱浙省號舍不敷且慮皖省應試人多奸宄未易稽查並商之浙省紳士所見相同僉稱窒礙等語朕思借闈考試原以嘉惠士林自當於變通辦理之中悉心籌畫若將江蘇安徽兩省士子分作兩次考試十月內江蘇士子入場安徽於十一月另爲一次不

過稍遲時日可無號舍不敷之慮而江蘇士子試畢先歸安徽士子後至人數以分而見少卽盤查奸宄亦尙無難是否可行並此外有無通融辦理之法著何桂清徐有壬會同胡興仁悉心酌議妥速具奏江南自軍興以來停止鄉試已閱兩科茲屆特開恩榜之年該士子若仍不得觀光未免有向隅之憾諒該督等必能妥爲籌畫仰副朕懷也禮部摺著鈔給閱看將此由五百里各諭令知之○以克復安徽六安州城賞參將成景巴圖魯名號復已革知州茅念劬職餘升敘有差○壬寅諭軍機大臣等瑛棨奏擊退亳州捻匪並調派兵勇堵剿一摺亳州撲城捻匪經朱連泰等督兵擊退而五馬溝等處均築有賊圩逼近豫境且據稱豎旗聚眾有俟雉河賊股齊集卽行西竄之信亟應迅速進剿以遏逆氛該撫抽撥歸陳等屬防兵派總兵朱連泰及承惠統帶出省進剿所

籌歸陳等屬畱兵守禦各節布置均尙周妥惟伊興額所帶豫省官兵業已改派關保統帶督辦該省防剿事宜見在調派各兵爲數不少軍威已壯進剿當可得力俟關保馳赴永城接替後卽令馳赴鹿邑督率豫軍相機攻剿以期擣穴擒渠至濰口一營亦關緊要傳振邦欲畱兵勇該撫仍當如數酌畱以均兵力將此由五百里諭令知之○駱秉章奏逆首石達開陷興甯宜章後先後闌入郴州桂陽兩城銳意攻常甯未陽窺伺衡州主簿魏喻義帶勇千名馳至陽武坪與管帶桂勇之員外郎陳士杰扼桂陽州小河遇賊竄常甯之路彼此互爲聲援大小數戰無戰不捷奪賊船筏數十礮械數百擒斬長髮悍賊千名解散脅從無數賊度常甯不可犯遂紆道陷嘉禾分股犯新田署知縣袁榮渭與在籍知府張榮組等登陴固守轟斃執旗賊目數名餘匪一百餘名乘其疲乏

開城出擊復斃賊數名生擒賊目胡英樞等七名賊眾逃竄躡蹤
追剿又斃賊數百賊遂分股至臨武署知縣王承順等固守城池
分遣練勇會同團紳設伏攻剿殲斃二千餘名餘賊遁嘉禾其大
股竄甯遠者署知縣雷壽南防守嚴密賊不敢近臣於此賊竄入
湖南時以賊在郴桂則茶陵安仁之龍海塘江口洲爲衡湘要隘
當派道員劉坤一統兵駐紮進剿而師船嚴扼湘江俾賊不能偷
渡以窺衡州及大股均竄桂陽嘉禾知其必將繞竄永州祁陽以
取上游之勢時道員劉長佑知府江忠義方在新甯本籍選募楚
勇臣密飭其成軍後卽由新甯取道東安祁陽赴衡並密調副將
余星元參將楊恆升等兩營由江華取道永祁赴衡皆諭以中途
出賊不意遇賊卽剿一面飭參將侯光裕署祁陽縣知縣劉達善
募勇嚴守城垣三月初二日劉長佑所部至祁陽賊謂祁陽有備

則疾趨永州劉長佑甫到祁陽卽飭江忠義等率楚勇赴永州而自率所部繼進三月初四日楚勇前隊抵永則賊已先到數時環布城外矣護永州鎮總兵侯光裕等悉力固守斃賊多名初六日劉長佑率親兵及江忠義知縣席寶田等分扼要隘李明惠由鳳凰嶺直擣千子地一帶賊巢遊擊江忠朝等張左右兩翼護之李明惠率勇衝入賊眾十餘起零星搥戰而林木間旗幟時隱時見忽張兩翼突出李明惠躍馬衝陣李榮忠劉通周分左右迎擊殪其先鋒悍賊數名賊稍卻江忠朝等揮左右翼鈔擊劉長佑江忠義見我軍合戰甚急乃揮營總陳希祥等由中路衝出李明惠追賊至千子地槍斃黃衣賊目數名江忠朝督隊由街右追至賊已出巢鼠竄斃賊不過數百名而賊之悍者多殪連踏賊巢五處府城與援軍聲息始通是夜劉長佑江忠義選勁卒入城助守初七

日劉長佑江忠義李明惠楊恆升於城外十里地方相度營壘初八日進紮煙竹鋪賊皆伏匿不動意待賊援麇至圍攻北路官營也是日副將余星元參將楊恆升馳至駐營柳子廟初九日卯刻劉長佑率江忠義等分路進剿余星光楊恆升率部渡湘亦分三路由西而北賊不意官軍猝至駭懼不知所措官軍兩路衝殺城中亦派隊助剿都司李金賜適自甯遠回援四面夾擊連焚賊營九座賊巢十餘處重圍立解是役統計斃賊六七千並殲斃偽大軍略蕭華卽蕭發勝蕭篤卽蕭篤麟二名生擒五百餘名其另股賊以官軍悉集永州意祁陽之備必虛將由祁陽竄衡州寶慶臣前飭祁陽紳士同知段瑩器募勇七百在縣城訓練飭副將何紹彩速集舊部千名赴祁聽調嗣劉長佑赴永剿賊臣調知府王勳率湘勇二千劉坤一帶勇二千並遊擊黃三清所部祁勇六百同

赴祁陽與永州大軍會師討賊又調道員趙煥聯帶所部馳赴龍海塘並統領各營以一事權飭浙江副將王明山統師船由衡州駛赴祁陽截賊偷渡湘江之路時委辦團防知府馮崑方行抵祁陽臣卽飭其督同署知縣劉達善籌辦防剿十三日賊悉眾至縣城下游十餘里觀音灘地方馮崑劉達善飭段瑩器何紹彩所部各勇馳赴觀音灘對岸扼紮賊旋卻退何紹彩等渡湘進剿見賊編筏偷渡急起擊之殺賊數十忽伏賊四出包鈔官軍余星元楊恆升余斌元三營自賊後馳至賊眾大駭余星元等分路縱擊斃賊數百賊奔敗官軍遂收隊渡湘入城是夜賊從觀音灘下掠船架筏偷過對岸時王勳所部馳至卽會同余星元等出隊迎擊共約斃賊千餘名奪獲羸馬近四百匹陣斬賊目僞將軍汪侗喜等多名生擒二百餘名兇鋒大挫臣維此賊自竄入楚境旬日之間

疊陷各州縣城池剽悍捷速勢極猖獗縱有見兵數萬分途馳剿
眾寡懸殊斷難決勝一或偶挫則大局不堪設想不得已以全力
專注永祁迎頭截剿冀得稍遏兇鋒幸賴 皇上天威將士用命
連獲大捷人心稍安官文所派援湘水師知府蕭翰慶一營楊載
福所派總兵王明山一營陳金鼇一營均派赴衡州以重上游之
勢馬隊一百九十四名疊經督 臣札催起程約本月底可到 臣亦
派弁迎護矣惟 臣前奏調援江之道員蕭啟江一軍尚未接據入
楚稟報援黔之副將田興恕一軍計期已抵楚界 臣飭其由武岡
赴寶慶聽候調遣俟此兩軍到後則衡州寶慶兵力始敷派撥據
獲賊供稱石逆決意由湘竄鄂赴皖與陳玉城李兆受合股又各
營獲賊訊供均言賊欲由湖南分犯鄂蜀 臣已飛咨湖北四川督
撫豫爲戒備 臣一面竭力籌辦務遏賊衝不稍鬆勁所有此次最

爲出力之將領及帶勇紳士仰懇 天恩量加鼓勵以昭激勸奏
入命記名道劉長佑以按察使提奏知府江忠義以道員卽選餘
升敘有差○調王慶雲爲兩廣總督未到任前以廣東巡撫柏貴
兼署黃宗漢爲四川總督未到任前以成都將軍有鳳兼署○撥
江西漕折銀二十萬兩陝西四川司庫銀各十萬兩備湖南軍需
○予河南陣亡總兵官邱聯恩在南陽並原籍建祠州判史存禮
吏目王庭蘭在睢州建祠○癸卯頒 硃諭朕聞香山臥佛寺西
牆外地名櫻桃溝有石板一塊下有涌泉可注於玉泉飛淙閣匯
爲瀑布若此水暢旺轉達昆明卽可提觴濟運著派綿勳錢寶青
明日前往該處查勘具奏尋奏遵查泉源雖不甚旺而下注不息
計達七八里之遙如能引歸長河於濟運不無裨益報聞○勝保
翁同書奏 臣等籌辦淮南大股捻匪設法剿撫兼施擒首張元澄

因見李世忠獻滁就撫赦罪授官翻然悔悟遂有乞降之請臣勝
保初未敢深信特以其既有向善之機何妨開以自新之路一面
派員進城察看動靜一面力攻懷賊離間黨援旋據張元濬等疊
具稟函情詞真切臣勝保卽頒示諭帖多方勸誠自正月以來屢
次傳令來見張元濬總因畏罪不前其妻劉氏深明大義赴營匍
匐軍門代夫請罪臣勝保傳令進見開導再三其妻感激涕零誓
以死報回城後催促張元濬卽於次日來營叩謁情願率眾投誠
殺賊自效經臣勝保宣示朝廷德威於詞嚴義正之中寓矜恤成
全之意權宜給予頂翎據張元濬稟稱一俟手下人眾安置妥協
卽行薙髮獻城臣勝保因陽示羈縻陰予鈐制嚴飭劉府殷家澗
一路駐守各軍加意準備爲明堵懷捻暗防鳳臨之計詎懷城張
逆諗知張元濬等撫議將成屢遣其姪張從導等來至城關從中

阻撓加以脅制張元澄亦遂畏首畏尾游移觀望三月十一日龔
逆親率大股悍匪撲至胡家集地方經臣勝保親督進剿殲賊甚
多首逆僅以身免十八日懷逆又復分股越過臨淮由然鎧寺岡
子集一路東竄梅城寺意在撲擾明光又經臣勝保派撥營總薩
薩布帶領馬隊盡力截殺殲斃數百名落河淹斃者不計其數賊
鋒大挫臨鳳人眾聞之亦皆氣奪臣勝保一面聲言取道鳳陽進
規懷遠一面親統馬步各隊排列鳳陽城南之甄家岡巡城周歷
大耀兵威張元澄因見張龔二逆屢受大創匪勢已窮遂毅然自
拔來歸稟請派員進城張元澄當卽率眾雜髮臣勝保於二十三
日統兵親赴臨淮張元澄叩謁道旁卽曲加慰勞策其奮勉圖功
並籌餉銀萬兩作爲眾丁賞犒以溥皇仁飭將所部人眾選精
壯一二萬立爲淮勝營分前後左右中五隊聽候調令隨同官軍

進勦其餘酌令歸農張元隆聽受惟謹並據面稟擬往淮北將附
從數十捻圩令其均行薙髮歸正亦卽許可臣勝保布置既定卽
日折回殷家澗商之臣翁同書當派署廬鳳道黃元吉等於二十
五日由臨淮前往鳳陽入城安撫士民降卒卽將鳳陽府縣兩城
及臨淮關一律收復查張元隆以數萬之眾帖然歸化立獻城池
以視李世忠辭成良自屬事同一律而其所獻地方歸降人眾較
多伏懇 皇上特沛恩施將張元隆寬免前罪賞給三品頂帶以
都司卽補其妻劉氏並賞給四品封典以資觀感而昭激勸其所
部出力頭目人等並候查明覈實分別奏懇恩施此次辦理招撫
在事文武員弁可否由臣等擇尤保奏之處出自 鴻慈 上諭
捻首張元隆自入鳳陽臨淮後見李世忠等先後歸順頓生悔悟
詣勝保軍前乞降約期薙髮獻城當將鳳陽府縣兩城臨淮關收

復該捻首以數萬之眾輪城效順立獻城池自應優加獎勵以爲
自拔來歸者勸張元隆著免其治罪並賞給三品頂帶花翎以都
司卽補其妻劉氏願知大義著賞給四品封典部下出力頭目著
該大臣等查明覈實奏請恩施其辦理招撫各員弁並准其擇尤
保奏○諭軍機大臣等本日據勝保等奏張元隆率眾投誠同日
收復鳳陽府縣城池及臨淮關隘刻下招撫之費自不可緩勝保
等前奏推廣捐例八條除該部議駁各條外其議准之候補班人
員准捐候補班先用保舉人員准捐入候補班及軍務省分人員
准於鄰近軍務省分通融捐升改捐軍營帶隊差委人員准捐免
赴部投供各條均經照議准行想該部業已行文知照矣至伊興
額前因勝保劾其欺飾乖謬業經革去頭品頂帶交勝保差委惟
其人久歷戎行打仗尙稱勇往著勝保酌分馬步各隊令其剿賊

立功以贖前愆不可置諸閒散之地見在臨淮旣已收復道路已通舒桐廬巢等處賊勢方張正當乘此機會督率各軍力圖南路其北路勦匪事宜有傅振邦關保等聯絡聲勢即可責成勦辦勝保一軍不至仍爲北路牽掣此次張元隆新降之眾畱充勇丁者自不乏驍健之材當令隨同官軍勦賊立功勿使游手散處致難於約束是爲至要將此由六百里諭令知之○甲辰免直隸密雲調防官兵應扣整裝銀○乙巳惠親王等奏遵議兩江總督何桂清等奏洋藥開稅請酌量減輕一摺查洋藥一項前奏推行各關照上海稅則每百斤收銀三十兩各省均已遵照辦理何獨江蘇各關僅徵稅銀數兩應令江海關監督設立印票填註商名並洋藥若干斤應交關稅銀若干兩給該商持赴經過稅關驗票納稅後換票放行卽將原票繳回仍令各關查照上海科則一樣輸課

卽將所徵稅銀按三箇月造冊報部以重稅課而昭覈實至洋藥徵收釐捐本與關稅有別原定銀二十兩旣於軍餉有裨應毋庸再加銀十兩以免該商藉口此後洋稅啟徵時仍飭令該商照常釐捐不得以洋稅抵作捐釐以杜牽混從之○丙午 上還宮○諭軍機大臣等庚長奏南北運河來源告竭請飭山東迅卽開壩一摺據稱江蘇運河以東省河水及微山湖爲來源見因來源告竭舟楫阻滯於餉道商販釐捐稅項諸多窒礙且兩岸民田灌溉攸資自應量爲疏洩新任河督黃贊湯到任需時瑛棨暫行兼署相距較遠著崇恩就近督飭該管道廳察看實在情形斟酌辦理務使開壩之後於江蘇境內實有裨益而於東河蓄水設防各事宜仍無妨礙方爲妥善庚長摺著鈔給閱看將此由五百里諭令知之○諭張芾奏官軍進攻建德疊獲勝仗請飭江西巡撫令總

兵普承堯暫畱會剿一摺逆匪聚建德並分股肆掠丁香樹一帶經副將王夢麟等帶兵往剿適普承堯駐軍青山橋撥兵分路夾攻連破賊營斃賊約以千計剿辦甚爲得手見在楊載福水師未能前往建德鄭魁士能否分兵助剿亦尙未定惟普承堯一軍越境會攻深資得力自應暫畱該處將建德之賊悉數埽除並可將景德鎮大股匪徒次第攻剿俾賊蹤不至蔓延鄱陽等處實於江西地方均有裨益著著齡卽飭該總兵暫畱建德會剿俟該處並浮梁一律肅清再行調回九江並著張芾先行就近知照該總兵遵旨辦理將此由六百里各諭令知之○丁未以捐輸軍餉永廣直隸天津縣學額三名○戊申諭內閣胡興仁奏剿捕餘姚縣匪徒一律肅清並查明肇釁玩誤之紳富縣令分別參辦一摺浙江餘姚縣匪徒因紳富平日收租苛刻業佃不和乘機煽惑釀成

劫犯圍城之事經該撫派令委用道胡元博署甯紹台道麟趾等
前往曉諭解散脅從並派遊擊黃金友帶兵相機剿辦首匪宣士
文等膽敢糾眾圍燒村莊殺斃紳富胡元搏等分兵進攻追至餘
姚上虞交界地方將宣士文拏獲其盤踞裏山匪首徐六耀亦經
該員等督帶兵勇攻破木卡立時擒獲生擒匪目多名奪獲槍礮
旗幟多件首要各犯均就地正法城鄉一律肅清辦理尙爲安速
此案因紳富平日收租苛刻積怨肇釁該紳士邵元照等把持官
府立碑縣堂復雇勇拏人以致釀成事端實屬膽大妄爲候選光
祿寺署正邵元照著卽革職舉人張文翰生員洪宗敏俱著斥革
一併交地方官嚴加管束其平日收租苛刻之職監史傑監生符
方增著一並褫革以示懲儆前任內閣學士朱蘭雖不知有設局
刊碑等事惟以在籍大員當鄉愚滋事時並不善言勸諭輒自避

居府城以致釀成巨案著交部嚴加議處同知署餘姚縣知縣崔家蔭於鄉民赴縣請減租穀時並不親往勘驗成災分數輒批令按七五折完納實屬擅斷妄爲餘姚縣知縣賈樹勳到任後仍照原批復輕聽紳士之言雇勇拏人亦有不合均著交部議處巡檢張鵬程與匪首宣士文來往以致閩邑士民控告實屬卑鄙著卽斥革永不敘用黃春生一犯仍著嚴拏務獲懲辦所有在事出力員弁兵勇及捐貲出力各紳董均著胡興仁擇尤保奏以示獎勵

○己酉 上幸圓明園○諭內閣和春等奏江浦官兵連獲勝仗一摺三月十五十八等日張國樑派李若珠馮子材等各帶所部擣賊中堅擊敗九洲洲悍匪復有另股萬餘圍撲周天培營壘該總兵揮兵突出斬馘無數該逆又在浦口之西築壘張國樑選派勁兵奪其要隘殺賊無算餘悉奪路而逃其西南賊營亦經周天

培同時攻克三戰三捷乘勢趨九洑洲大路共奪毀賊營卡壘二十餘座逆勢挫衄自行撤退至二十五日我師三路進兵殺賊數百名近處逆壘一律踏平賊勢已形窮蹙著和春張國樑督飭將弁水陸分路堵剿無任蔓延○諭勝保等奏進剿霍山賊匪立克縣城一摺官軍克復六安後敗匪分竄經茅念劬等跟蹤追殺斃賊無數直至霍山北面該署縣王自輅見大隊齊到奮勇進攻立將守陴之賊全行擊退乘勢登城賊向東門出竄我兵入城一面追殺斃賊數百名生擒百餘名奪獲礮械多件將霍山縣城克復其舒城來援之賊先經我軍於白洋鋪地方截剿殲賊千名大獲全勝逆匪分踞霍山爲六安犄角經官軍先後克復辦理尙爲得手在事出力員弁兵練著併入克復六安案內擇尤請獎候朕施恩○諭軍機大臣等和春奏六合逆匪圍撲官兵營盤派兵援剿

等語該逆糾合六合城中賊黨由西北至東北直犯官兵營壘富
明阿等分投迎擊該逆復由馬鞍山分股鈔襲並過河東大肆兇
撲富明阿張玉良均各受傷似此逆猷鴟張亟應厚集兵力以遏
兇鋒和春見派兵勇四千交總兵熊天喜統帶渡江援剿著卽飭
令前進如兵力不敷仍當酌量調撥悉力堵剿該逆麇聚六合不
獨儀揚一帶岌岌可虞且恐逆蹤東竄擾及天長盱眙窺伺清江
富明阿務當激勵將弁會合江南援軍奮力剿擊迅克六合以扼
要衝毋令該逆分竄將此由六百里諭令知之○諭據勝保奏六
安霍山相繼克復惟防兵單薄請飭將防豫之軍移紮霍六一帶
等語霍六爲賊犯楚豫要道旣經克復卽須重兵扼守方免疏虞
官文等前因賊擾湖南郴桂等處派兵往援未能深入皖境自係
實在情形胡林翼駐紮黃州多隆阿爲前敵如見在布置已臻周

安亦可酌量分撥前往霍六聯絡皖軍既以固豫省東西門戶卽以防該逆鈔越楚軍後路該大臣等務當悉心妥籌毋致顧此失彼將此由六百里諭令知之○庚戌諭內閣惇郡王奕諱第五子著命名載津○諭前因甯國需餉甚急諭令胡興仁按月籌解銀十四五萬兩迅卽解往茲據鄭魁士奏甯防攻剿喫緊就見有兵數不敷調遣必須稍添兵勇方足以資勦辦請飭浙省月撥餉銀十四五萬兩按月撥解勿遲等語見在甯防各路俱形喫重總因兵力單薄不能迅速殲賊自應酌添兵數力籌餉需著胡興仁仍遵照前旨按月湊足銀十四五萬兩剋期解赴甯防毋稍遲誤將此由六百里諭令知之○予江西陣亡知府劉騰鶴等祭葬世職○壬子諭內閣張亮基徐之銘奏兵練圍攻城外回眾肅清一摺雲南省屬眾上年就撫後於南城外江右館駐紮時聚悍回搶劫

訛詐並紮營於碧雞關要路經張亮基等飭署安甯州知州慶安招集練目謝連科等暗襲碧雞關回營擊斃回眾七百餘人嗣官兵與各鄉團疊次分攻將木柵攻破殲斃首匪馬占魁並賊目十餘名又攻破白馬廟彌勒寺回營斃二百餘人兵練遂進攻江右館殲斃悍匪千餘人回眾窮蹙各分散歸籍回匪久踞雲南省城外諸多不法該練目等轉戰兩月將該匪全行驅逐省城得以肅清實屬著有微勞著張亮基等擇其尤爲出力者奏請獎敘以示鼓勵○諭軍機大臣等本日胡興仁奏提臣志氣日驕軍心不服一招據稱提督鄭魁士性情乖僻措置失宜南陵被圍吳再升胡鳳鳴等求援因有書無稟怒擲於地竟不發兵及至賊退謂係該提督聲威非諸將之力都守以下露體箠楚道府以下當面訶斥凡鄧紹良得用之人不論賢否必遭屈辱前隨鄧紹良陣亡兵勇

二千餘名至今尙不查明請卹等語以上各款如果屬實是該提督情性乖張誠恐將士解體於軍務大有關係著和春何桂清秉公查明據實具奏至所稱鄭魁士於一切軍務未准咨商招募勇數亦不造冊咨知無從查覈則是胡興仁負氣之言亦難逃朕洞鑒惟甯國防務見當喫緊之際朕閱鄭魁士前日奏催浙餉摺內亦多有不滿胡興仁之言該二員器量淺隘各不相能恐致貽誤大局鄭魁士平日打仗尙稱勇往前在皖北卽不能與福濟和衷辦事見在甯國復蹈故轍恐難勝統帥之任著和春等悉心體察毋得以保奏在前稍存回護硃批原摺著鈔給閱看將此由五百里諭令知之○癸丑壽恩固倫公主薨 上親臨賜奠○甲寅諭內閣朕姊壽恩固倫公主淑慎柔嘉性敦仁孝自幼仰承 皇考皇妣恩眷至爲優渥昨聞薨逝軫惜良深業於昨日前往奠醊

本月十六日朕再行親往賜奠用示眷念優加至意○乙卯 上還宮○丙辰以京畿雨澤愆期 上詣 天神壇 關帝廟拈香

重臨故壽恩固倫公主第賜奠○幸圓明園○諭軍機大臣勝保奏賊撲儀徵揚城情形危急等語粵逆大股由浦口一路東趨六合經勝保派兵迎擊疊獲勝仗乃該逆盤踞竹鎮一帶分大股由六合官軍後路竄撲儀徵勢將逼近揚城亟應迅速截剿以杜分竄勝保見派總兵張得勝帶兵由天長南路前進以擣其後有此一軍自可稍牽賊勢惟逆蹤飄忽必須迎頭截擊方能力遏其衝毛三元見在防守揚州著勝保就近調度飭令帶兵迎剿爲兩面夾攻之計該大臣見已親督大隊由池河馳赴汴澗即可節節前進相機布置毋令該逆蔓延本日據伊興額奏舊病復發懇恩開缺回籍調理等語伊興額前經勝保參奏降旨革去頭品頂帶以

示薄懲茲復奏請開缺難保非有心負氣著勝保查明該員如有捏飾情弊卽行據實嚴參如實係患病亦飭令在營趕緊調治痊愈帶隊自效不准回籍以杜規避而儆效尤將此由六百里諭令知之○撥山西司庫銀十萬兩備天津軍需○以履勘平安峪

萬年吉地出力贈故直隸按察使陸應穀巡撫銜餘升敘有差○戊午諭軍機大臣等和春奏逆匪分股直犯揚州一摺昨閱勝保奏報大股賊匪由六合官軍後路竄撲儀徵將偏揚城本日據和春奏稱該逆銳意東竄雖經飭令張玉良督同馬得昭揀帶勁旅先後馳往堵剿已由小路竄過儀徵並突至揚州西門繞擾五台山及三岔河等處不意賊蹤飄忽至此揚州係南北要途應飭張玉良等悉心保障兼顧裏下河各屬而高郵邵伯爲北走清淮門戶和春等旣添派兵勇一千名交張玉良調遣務須飭其嚴防北

犯其東路通秦一帶尙爲完善之區更不可令其蹂躪腹地至該逆聲言欲竄瓜州則瓜鎮京口水陸均須嚴密布置該大臣復由金陵派兵一千名赴鎮江巡防並著嚴飭鞠耀乾督率水師扼守江防勿令偷越見在浦口九洑洲尙有賊來援揚州軍情復如此緊急著和春等會同張國樑隨時應援並與勝保派援之兵探賊所向互相策應務全大局其六合兵勇雖因援剿揚州暫時移撤亦不可任賊猖獗別有他虞將此由六百里諭令知之○以載肅爲內閣學士由光祿寺卿遷○己未諭軍機大臣等本日已有旨著勞崇光調補廣東巡撫兼署兩廣總督曹澍鍾補授廣西巡撫矣新任兩廣總督王慶雲到任尙需時日見在廣東辦理夷務正當喫緊之時勞崇光於接奉諭旨後卽行交卸迅速前赴新任以便黃宗漢交卸啟程來京毋稍遲延將此由六百里諭令知之○諭庚辰

奏江北賊氛愈熾籌遏北竄一摺逆匪圍撲揚州經和春派安勇馬得昭帶兵趕到擊退賊匪立解城圍而天長突於十一日失陷該處接壤儀揚東通甘泉高寶北達蔣壩庚長已咨商傅振邦派兵由固鎮渡湖東援並於高澗募勇集團爲蔣壩後路策應復經邵燦派令鶴齡酌帶兵勇赴衡陽以固淮安門戶布置尙臻周妥本日因邵燦患病開缺令袁甲三以三品頂帶署理漕運總督到任尙需時日已降諭旨令庚長兼署漕督篆務此時賊氛愈熾該河督務須督飭所屬加意堵剿勝保前派張得勝由天長南路進剿是否趕到該大臣本從池河赴汙澗調度應卽酌度緩急探賊所向迎頭截擊勿使北犯清淮並迅圖克復天長勿令久踞其天長連界之滁州等處如何兼顧妥爲辦理傅振邦見當攻剿捻匪喫緊之際庚長咨調之官兵二千名著體察情形如能分撥迅速

派赴蔣壩毋稍遲緩將此由六百里諭令知之○邵燦以病免以

袁甲三署漕運總督

由太僕寺卿遷

未到任前以江南河道總督庚長兼

署○廣東巡撫柏貴卒予祭葬○調勞崇光爲廣東巡撫兼署兩

廣總督未到任前以廣東布政使畢承昭署理以曹澍鍾爲廣西

巡撫李承恩爲廣西布政使蔣益澧爲廣西按察使

由補用道遷

○辛

酉諭軍機大臣等前因烏蘇里江等處距興安嶺遙遠不與俄國

連界諭知奕山飭令吉拉明阿如遇夷船下駛設法阻止本日據

奕山等奏俄船於黑龍江往來已成習慣若遽行拒絕恐其有所

藉口等語黑龍江左岸地方既經奕山借與居住其船隻往來於

黑龍江松花江中自難再行拒絕至綏芬河烏蘇里江兩處係吉

林地方不在借給之內若聽其紛紛駛往勢將何所底止奕山等

並不體會前次諭旨遽以難於拒絕等詞覆奏殊涉蒙混著奕山

仍遵前諭嚴飭吉拉明阿曉諭除由黑龍江入松花江往東入海口外餘如綏芬河烏蘇里江及三姓等處夷船均不得擅自駛往務得實力勸阻毋許意存推諉並著特普欽派委妥員於黑龍江交界地方嚴密偵探設有夷船駛至卽行正言拒絕以該處地方本不在前次許借之內亦無與俄國毗連地界無可查看阻其下駛將此由五百里各諭令知之○諭據勝保等奏天長失守情形並見籌布置各節賊匪竄踞天長意欲由天盱一路北竄清淮直犯揚儀然後糾合浦六匪蹤爲援金陵之計勝保見在駐紮舊鋪地方以扼該逆北竄盱眙之路並撥兵於馬家壩紮營以聯蔣壩聲勢所籌均尙周妥著俟淮北調撥之馬隊一到該大臣卽親督調度探賊所向迎頭截擊迅圖克復天長勿令久踞並一面飛咨庚長等分飭嚴防蔣壩及高寶各湖勿令賊蹤闌入袁甲三被參

案內之約遜已令該旗飭赴勝保軍營聽候查辦矣將此由六百
里諭令知之○成郡王載銳薨賞銀五百兩治喪諡曰恭○賞還
安徽天長陣亡提督德安花翎勇號並予祭葬世職諡威毅○王
戊諭內閣本年入春以來雨澤稀少米糧騰貴加以銀價日增錢
法壅滯兵丁生計維艱朕心實深軫念著自五月爲始所有在京
八旗及巡捕各營兵丁月餉應放鈔票折銀三十五萬一千兩零
內加恩搭放實銀三成應由何款項下發給著戶部覈辦其八旗
應放粟米折色舊例每石折給京錢二千四百文並著加倍放給
用示朕體卹兵丁至意○諭勝保傳振邦奏收復澮南賊圩並官
軍攻克介溝賊圩大獲全勝一摺澮南一帶附近圩賊經勝保等
分派馬步分投出隊將蒙城縣境之王家圩吳家圩戴家圩張家
圩次第收復圩眾悔罪投誠其鳳陽縣東北之胡家圩楊家集圩

黃墩集圩亦經參將滕家勝等帶隊前往同時收復飭令一律薙髮四月初六日副將博崇武帶領馬隊進逼蒙城西南賊圩將戴家窯賊圩收復救出老幼男婦一萬七千餘人壯丁六千四百餘名其宿州迤西介溝賊圩經知府苗沛霖帶領練勇於十四日四更出隊先將伏路卡賊殲斃直抵圩邊搶入重濠兵練緣牆直上與賊短兵相接斃匪甚多生擒一百四十七名立時正法餘眾伏地乞降擒匪經此次痛剿賊膽已寒仍著勝保傳振邦督飭將士進克板橋賊圩以清餘孽○諭軍機大臣等傳振邦奏北路軍情緊要請添撥馬隊助剿等語粵逆見由六合紛竄蔣壩圩貽喫緊清淮亦在戒嚴該提督因馬隊不敷調遣請於天津防堵官兵內添撥得力馬隊一千名前往助剿惟天津續調吉林黑龍江兵二千名原爲慎重海防起見是否可酌撥五百名前往傳振邦軍營

之處皆循格林沁酌量辦理如此項官兵不能抽撥卽著該大臣於備調之綏遠歸化二城官兵內調撥五百名飭令馳赴安徽蒙城一帶交傅振邦調遣並著一面奏聞一面咨調毋稍延緩將此諭令知之○諭前據崇恩奏派撥兵勇交富新黃良楷統帶由兗州出境與徐宿官軍訂期會剿並因傅振邦奏攻濶南賊圩獲勝諭令崇恩飭該鎮道等速行前進本日據傅振邦奏稱捻匪由永城夏邑擾及碭山直趨北路聲言欲犯山東已派副將博崇武會合協領常陞各帶馬隊鈔出賊前截擊並咨會東省一軍相機回顧等語捻匪圖犯山東勢甚猖獗若竟由碭山北竄則魚臺金鄉一路在在堪虞著崇恩飭駐紮該處之副將郝上庠督飭兵勇相機截剿並與傅振邦派往各馬隊官兵聯絡聲勢併力夾攻毋任闌入東境至此股賊勢浩大所有前派會剿兵勇自應先顧本

省邊防如相去已遠驟難折回亦當就本境防兵及鄉勇等派令實力堵禦著該撫悉心斟酌妥爲調派不得稍涉大意致滋貽誤將此由五百里諭令知之○王懿德以病免以慶端爲閩浙總督羅遵殿爲福建巡撫未到任前以布政使瑞璜署理以莊受祺爲湖北布政使嚴樹森爲湖北按察使由荆宜施道遷○癸亥雨○甲子

上詣 大高殿報謝還宮○乙丑賜孫家鼐等一百八十人進士及第出身有差○幸圓明園○諭內閣樂斌奏甯夏口外匪徒乘間肆擾請分飭鎮道出口會哨等語甘肅甯夏口外蒙古地面曠闊匪徒乘間肆擾自應嚴加巡緝著照所議卽由阿拉善親王遴派委員操練蒙古兵丁每年自三月至九月在於蒙民聚集各要隘梭織巡查如遇賊匪出搶卽併力擊捕送交內地審辦儻持械拒捕准其格殺勿論至甯夏鎮總兵及甯夏道均有地方之責尤

應親歷巡查以資彈壓嗣後著該總兵於每年三月內統帶弁兵出口在磴口上下游一帶與蒙古會哨一次甯夏道於九月內選帶幹役出口與蒙古會哨一次如有賊匪潛匿務須悉數拘拏嚴行懲辦毋得日久生懈視爲具文該督仍飭各州縣營汛於所管卡隘派撥兵役常川盤詰稽查儻有內地民人私行出入形迹可疑者立即嚴拏審明治罪如敢任意疏懈將來拏獲匪徒訊明係由何處出入即將該管文武指名參處以靖邊圉○奕山等奏綏芬河烏蘇里江皆係吉林地方不在借給之列乃俄人潛在烏蘇里口以下南岸舊居博力地方添建房間並於古克達蘇等處建房牧放牛馬任意侵占俄官奇薩羅幅復帶同通事到卡聲稱會勘烏蘇里河源興開湖分界有自行去占之語上諭軍機大臣等該夷占地建房並欲會勘地界總由奕山輕允黑龍江左岸地

方以致肆意占踞該將軍既已貽誤於前並不思力圖挽救乃輒奏稱事屬吉林應由吉林主稿免致往返貽誤顯係有心推諉惟奕山既輕諾於前此時礙難阻止宜其一籌莫展著特普欽督同署三姓副都統富呢揚阿曉諭木里斐岳幅黑龍江左岸空曠地方許其借住已屬中國優待之意吉林界內係中國採捕葢珠之地斷不容爾侵占若背約妄行必致有傷和好興開湖等處本不與俄國連界無可會勘豈得以曾在黑龍江具文爲詞意圖狡賴該署將軍等務當正言拒絕不可含糊了事嗣後奏事關涉吉林著卽由吉林主稿一面會銜一面具奏免致往返札商徒稽時日至奕山吉拉明阿亦應力圖補救不得因地屬吉林希圖諉卸將此由五百里各諭令知之○諭官文胡林翼奏湖北見需馬隊擬借撥黑龍江甲兵千名請飭天津軍營酌量施行等語見在竄擾

湖北之賊甚多恐其闖入湖北馬隊旣甚得力自應豫調以備不虞著僧格林沁體察情形如天津防所黑龍江甲兵內尙可抽調卽著酌量借撥飭赴軍營應用原摺著鈔給閱看將此諭令知之○官文胡林翼奏楚軍入皖者多隆阿鮑超等已逼近太湖計馬步九千餘人道員唐訓方蔣凝學等率七千人進駐太湖迤南之荊橋爲多隆阿等後路接應其畱防陳德園之軍則以參將阿達春同知歐陽正墉領之計二千五百人以彌縫太湖之闕其分進英山一路者爲參將余際昌之二千人通計入皖之師已逾二萬餘人其分駐羅田麻城等處不過千人五百人耳以地勢賊情而論必非市月所能奏功水師圍攻安慶亦必待太湖東流潛山及安慶之石牌克復乃可馬步併力於安慶又前因小池口防守空虛分兵扼守曾國藩近於湖口要地添派知府屈蟠一千人而南

岸東流縣城爲水師餉道所必經復由鄂省酌調參將黃澤遠前往駐守此東路布置之情形也黃州六千餘人訓練已成因商固告警恐賊從六安霍山繞出漢陽德安黃州之間又因湖南永州所屬徧地皆賊恐侵及衡州寶慶之邊邑先後撥去水師四營陸師四營馬隊二百名湖南撫臣駱秉章念鄂城之虛空復將漢軍文生李雲麟一營調回鄂城湘省賊勢方熾備多力分且虞滋蔓設衡寶兵力不敷則岳鄂同時震動將有防不勝防之患見於麻城黃州抽撥二千人回防武昌並於下游潯皖江面再調水師二營回防岳州此又南路布置之情形也勝保前奏自未悉湖南近日情形不知鄂省南路空虛長江天險勢若建瓴使賊於湖南逞志則由南路拊鄂之背由西路窺蜀之藩後患方大兵事轉恐棘手征皖之師孤軍未可深入應俟湖南軍務稍定方可併力皖省

又奏臣胡林翼墨經從軍志在討賊其必不能入皖之故則以楚境鄰氛四逼前此尙止策應皖江南北岸近日湖南震驚更須兼慮南路自應仍紮黃州以爲北路根本將軍都興阿及多隆阿鮑超李續宜唐訓方共事最久誠信相孚必可得其心力設異日出省遠剿驟歸他人節制恐性情未必相投不若各剿各路以專責成庶兩軍不起猜嫌而大局仍不分畛域應請嗣後楚軍無論入皖界入江南界其糧餉軍火及調度機宜均歸臣官文臣胡林翼一手經理較歸各省大臣節制呼應自靈也至逆首久踞金陵原宜併力東征成四面合圍之勢惟皖中全境糜爛實難躡等而趨去歲三河之挫欲速反遲可爲炯戒查安慶爲長江上下關鍵舒桐宿太爲江楚通衢東流蕪湖東西梁山太平采石遠迤大江兩岸在在皆有賊蹤使未能節節掃除卽令迅克金陵亦慮蔓延江

浙後患尙不可知竊計規復金陵必須先清皖省欲清皖省必須
先清沿江上下若能以馬步輔翼水師由宿太舒桐攻克安慶步
步爲營次第下擊力扼大江則金陵之接濟可斷勢將不攻自克
廬州離江旣遠又不與楚境毗連若由六安進攻陸路運餉綦難
又係孤軍深入見派參將余際昌等紮營於英霍之間爲六安後
路聲援勝保一軍尙不爲單見在應援浦口一路如能得手自當
以全力圖復廬州廓清北境進規懷鳳遠固淮徐然後專注東南
楚軍亦沿大江而進曾國藩旣定豫章卽由皖南而進水陸並下
三路分馳必可埽穴擒渠以安全局見楚軍已進太湖英山俟湖
南分援馬步水師撤回便擬力圖進取均報聞○丙寅諭軍機大
臣等勝保等奏賊眾兵單軍情危迫一摺自逆匪攻陷天長勝保
移師扼守盱眙前路並親至舊鋪調度詎逆勢眾多將汧濶營盤

層層圍裹張得勝一營雖已撤出其成興黃誠忠等所帶川兵川
勇尙未突出重圍自宜保全勁旅毋令爲賊所困著該大臣激勵
將士內外夾攻務將全軍撤出爲要見在賊勢旣趨重盱眙一路
儀揚情形自必稍鬆本日已諭令和春等迅派援師不分畛域赴
天長一帶越境會剿勝保卽可會同剿辦仍嚴防盱眙前路毋令
竄越樂善見在天津防海恐未能前往安徽所請調撥馬隊之處
已諭知僧格林沁酌量辦理矣將此由六百里諭令知之○諭勝
保等奏江北逆匪竄入天長盱眙境內竭力分軍堵剿一摺勝保
因天長復陷移師扼守盱眙前路飭令各軍分路堵禦詎該逆攻
撲營盤勢甚猖獗見在逆匪六七萬悉數集於皖境自六合以達
天長橫軼四出盱眙爲北路扼要之地設有疏虞剿辦愈形棘手
和春等前派熊天喜帶兵四千渡江援剿復添派兵勇一千交張

王良調遣此時儀揚一帶布置諒已周妥勝保一軍兵力既單賊勢過多情形甚屬危急和春總統大江南北自應統籌兼顧著與張國樑會商迅速調派援軍前往與勝保會同剿辦毋令北竄清淮是爲至要將此由六百里諭令知之○以蔣益澧爲廣西布政使李開爲廣西按察使由鹽法道遷○予安徽陣亡知縣楊定升等河南被戕典史蕭葆仁祭葬世職○戊辰諭軍機大臣等前因廣東辦理夷務軍務正當喫緊諭令勞崇光接奉諭旨後卽赴廣東巡撫新任並署理總督以便黃宗漢交卸啟程本日據畢承昭奏近來廣東省城民夷尙屬相安其失守之大埔嘉應兩城均已克復興甯亦已解圍惟賊匪分股竄赴連平圍困州城並擾及和平龍川等縣鄉村其韶州府屬之樂昌縣亦已失陷雖經官兵擊勦獲勝賊尙盤踞城外其連界廣西湖南江西福建四省之地時有外

匪竄至肅清非易等語廣東嘉應大埔樂昌失守黃宗漢均未入奏雖據畢承昭奏稱該督親自督兵克復大埔嘉應見駐龍川河源一帶就近調度而黃宗漢既置夷務於不問又於軍務情形數月不發奏報其有無心病尙未可知見在王慶雲到任尙需時日著勞崇光迅卽馳赴廣東將失陷各城其圖克復其被圍被擾各地方應行撥兵援剿之處趕緊布置俾賊蹤不至蔓延並於到任後察訪黃宗漢有何疾病一切地方要事何以概不發報據實奏聞將此由五百里諭令知之○己巳以捐輸軍餉永廣江蘇青浦溧陽學額各二名○是月蠲緩浙江杭州等三府暨衢州等各衛河南光州等二十三州縣山東濟甯等五州並臨清等二衛被賊被擾地方新舊額賦賑山東城武等六縣衛貧民一月口糧

五月庚午朔諭軍機大臣等本日據勝保翁同書奏逆匪占踞天

長汊澗盱眙後路仍形危急請飭催各路進兵一摺前據勝保傳
振邦各奏撥天津馬隊見因海防未撤不能多撥已諭僧格林沁
調撥黑龍江馬隊一千名赴傳振邦軍營此項馬隊到時卽由傳
振邦分撥五百名交勝保軍營調遣除樂善見有經手事件業經
僧格林沁覆奏不能令其帶兵來皖外其江南大營已派熊天喜
帶兵四千渡江援剿復添派兵勇一千交張玉良調遣見在擊退
揚州撲城之賊復分兵保守邵伯等處本日復諭和春卽飭毛三
元等與勝保合剿天長無須另派鎮將帶兵赴皖矣勝保不可專
待天津馬隊惟當就見有兵力分投堵扼迅克天長而解汊澗之
圍以期埽清北路湖北各營東下之師雖已紮營於英霍之間止
能爲六安後路須俟分撥湖南馬步水師撤回方擬力圖進取一
時固難移兵深入皖境且都興阿楊載福等軍前據官文等奏明

即使東下亦不能受他人之節制也將此由六百里各諭令知之
○諭僧格林沁奏通籌南北大局請添撥馬隊官兵專防北竄一
摺粵捻各匪意圖北竄自應厚集兵力藉資扼剿著僧格林沁卽
將前派赴傅振邦軍營之吉林馬隊一千名調赴山東卽派協領
德楞額統帶前往行抵東省後由崇恩飭令前往曹單一帶相度
緩急扼要駐紮並將黑龍江馬隊一千名派赴傅振邦軍營到營
以後著傅振邦分撥五百名前往勝保軍營調遣其管帶此項馬
隊著於各協領內揀派較爲得力者二員管帶南下一俟到營卽
由關保等統帶可資得力將此諭令知之○諭本日據勝保奏大
股粵逆屯踞天長汭一帶請飭各路進兵會合堵剿一摺逆匪
大股屯踞天長屢撲官軍營盤勢極猖獗勝保駐紮盱眙兵力較
單誠恐不敷扼剿本日據和春等奏已撥兵赴江北擊退撲揚州

之賊並分兵保護邵伯一帶是江南赴援之兵已在勝保前路著和春卽飭毛三元等一面嚴防該逆回竄一面分兵馳往天長汭洲一帶會合勝保一軍兩路夾擊速克堅城以固北路藩籬是爲至要將此由六百里諭令知之○予安徽陣亡縣丞紀堪傑祭葬世職○辛未諭軍機大臣等前據官文等奏請撥黑龍江西丹一千名赴楚助剿並派協領巴揚阿襄帶軍裝銀兩前往調取當經諭令該將軍照數挑選候調嗣據奕山等奏已將西丹一千名挑選齊備俟巴揚阿到後卽可將此項西丹帶往湖北軍營所有天津馬隊卽可毋庸調撥以免周折至該大臣等請撥黑龍江馬二千匹亦經諭令該將軍照數湊足統交該將軍帶往將此諭令知之○諭本日據勝保等奏天長賊匪眾多請飭和春令周天培帶兵數千前往盱眙會剿續復具奏業經將汭洲賊壘平毀卽日進

兵直偪天長等語周天培見駐浦口恐未能舍浦口而就盱眙張玉良前帶兵赴揚州熊天喜又帶兵四千渡江又有海全帶馬隊四五百名由儀徵馳往揚州一帶助剿均係和春派出之兵著卽在各軍內酌量調撥前往勝保軍營會剿天長賊匪以期速克城池揚州與天長毗連若由揚州進兵攻其南再撥兵繞至盱眙會同勝保攻其北更爲得力著該大臣相度機宜妥爲籌辦將此由六百里諭令知之○諭瑛棨奏請飭袁甲三赴豫督辦團練防堵歸陳等語該二府見辦堅壁清野旣已次第告成自應派員董率以期聯絡惟袁甲三已令署漕運總督該省紳士中如另有諳習軍務鄉望素著者著瑛棨查訪奏請派令督辦團練如紳士不得其人卽由本省官員內遴選奏派亦可將此由五百里諭令知之○癸酉諭內閣工部寶源局奏鑄辦鐵錢需用平鐵等語寶源局

所需鐵斤由山西省採辦按季解京因上年所解潞鐵不堪鼓鑄業經咨行山西巡撫嗣後一律均用平鐵茲據奏稱山西應解該局秋運二批鐵斤仍由潞安府辦運恐誤鼓鑄著山西巡撫將應解寶源局鐵斤一律用平鐵運解如平鐵或有不敷卽照鐵錢局三七成搭運俾利鎔鑄○乙亥欽差大臣大學士桂良等奏接到英酋照會將赴天津請派大員暫爲照料得旨總以上海換約爲第一要義卽使不得已俯就下策停泊攔江沙外少帶從人實爲妥協尤必須該夷酋正身赴京抵京原爲換約萬不能聽其久駐也○丙子諭軍機大臣等前據駱秉章奏江西南安賊匪竄擾湖南桂陽等縣情形喫緊咨調貴州都勻協副將田興恕經蔣蔚遠派署古州鎮總兵正資剿賊當諭令蔣蔚遠與駱秉章咨商辦理茲據蔣蔚遠奏田興恕接奉楚南檄諭卽於三月初九日啟程赴

楚請飭令該副將迅回黔省仍統帶黔楚兵練剿辦賊匪等語貴州自黎平解圍後田興恕乘勝進攻古州大坪一帶賊匪卽日以殲除剿辦正當得手之時自未便遽行調赴他省著駱秉章飭令田興恕帶同原隊迅速兼程仍回黔省剿賊以資得力所有兆琛一軍卽令全數撤回楚南助剿如此一轉移間於黔楚軍務兩有裨益毋致顧此失彼將此由六百里諭令知之○諭傳振邦奏連破賊圩生擒擒首陸連科並截擊北竄擒眾各情岷縣解圍敗擒由鄰城出境遁回老巢已據崇恩奏到此次該提督於旬日內疊破堅圩生擒渠魁擬俟東南各圩撫定移營西向次第進剿劉添幅等各巢並約會關保整軍東征爲牽掣之計其苗沛霖所率練勇亦飭令約齊潁上太和阜陽各團練分擣孫葵心巢穴以期悉數殲旃所籌尙爲妥協惟擒匪股數甚多地勢寬闊保督軍

已抵灘口傳振邦暫駐蒙城板橋集即可分道並進合力兜擊見復派吉林馬隊一千名交崇恩調遣駐紮山東南境遙爲聲援所有富新黃良楷所帶兵勇亦可飭令前進仍與郝上庠等互爲聯絡毋令捻匪仍竄東境將此由六百里各諭令知之○予貴州陣亡知縣桂蕊香廣西陣亡參將黃開亮祭葬世職○丁丑以守城出力永廣福建建安甌甯文武學額各三名○戊寅予湖北殉難知縣董文煜等並安徽殉難給事中方允鐸祭葬世職○己卯特普欽奏俄目不聽理論動以木里斐岳幅爲詞而木里斐岳幅則以前約內有烏蘇里河至海爲中國俄國同管之地一語請飭吉拉明阿與之申明前約分較明晰俾免藉口 上諭軍機大臣等烏蘇里等處與俄國並不毗連何以奕山等所議條約有與俄國同管之語況該夷見欲開山修道則其本不過海亦可概見奕山

等許其會勘尤爲輕率著奕山傳知吉拉明阿向木里斐岳幅言
明從前初議之時未深悉吉林地界見在查明烏蘇里綏芬河等
並非俄國接壤又與海道不通自應將此語更正不但圖勒密博
力孤吉及三姓等陸路不可任意侵占卽綏芬烏蘇里河路亦當
與之約定不准人船駛往總宜將木里斐岳幅折服則其餘夷目
無所藉口後來人船方能斂戢若謂地在吉林意圖推諉奕山吉
拉明阿恐不能當此重咎也特普欽旣經飭知富尼揚阿於三姓
地方就近拒絕其黑河口牝牛河等處並著轉飭各該副都統一
體防範務期會商力阻亦不可因貽誤由於奕山等遂謂難於籌
辦也將此由五百里各諭令知之○庚辰刑部左侍郎靈桂以進
內值班誤穿服色革職畱任降三品頂帶○辛巳諭軍機大臣等
張家口白城子地方向值俄羅斯學生換班之年有該國人在彼

牧放牲畜人數本屬無多聞近日愈聚愈多竟至千餘人並有槍
廠器械是否照常安靜或與民間影射貿易抑或有打造軍器等
事見在該國存居人數究有若干著慶昫密派委員不動聲色細
心訪察據實具奏○壬午諭軍機大臣等前因胡興仁奏鄭魁士
志氣日驕軍心不服當諭和春等據實查奏本日據該大臣等奏
到已降旨令周天受督辦甯國軍務鄭魁士調回江南大營矣鄭
魁士自調赴皖南辦理軍務一切尙無貽誤其平日打仗勇往朕
亦深知惟賦性急躁不能容忍是其素病胡興仁不能和衷共濟
亦屬器量淺隘見命周天受督辦甯防該員久在皖南情形熟悉
勦辦當能妥協甯國與金陵唇齒相依且爲江浙屏蔽當此賊氛
靡定全在文武和衷方能士卒用命從前鄧紹良因糧臺積欠過
鉅軍情渙散致有挫失前車可鑒開繫非輕周天受駕馭兵丁固

宜嚴加約束胡興仁身任封疆籌畫餉需尤屬責無旁貸仍著每月按照兵勇人數籌撥軍餉源源接濟儻或稍存意見致有貽誤恐難當此重咎也將此由五百里各諭令知之○命署湖南提督周天受督辦安徽甯國軍務浙江提督鄭魁士赴欽差大臣和春軍營剿賊○乙酉諭內閣常清奏請嚴定捕盜章程一摺據稱朝陽赤峯境內有奉天省騎馬賊匪百數十人竄至肆劫土默特旗界內清河門地方復有賊數百餘拒傷社長多命之事此等匪徒總由奉天查拏緊急以致紛竄入熱河境內自應一律嚴拏所有見獲賊犯張泳幅等二名卽著該都統於審明後嚴行懲辦此後熱河地方如有盜匪持仗拒捕者准其格殺勿論如訊明實係大夥匪徒聚眾肆劫卽著不分首從先行就地正法加以梟示其尋常盜犯仍著各按本例定擬以儆奸宄而安良善○諭綏芬烏蘇

里河地屬吉林並不與俄國接壤亦並非黑龍江將軍所轄地方
上年該將軍奕山輕信副都統吉拉明阿之語並不與俄國使臣
剖辨明白實屬辦理不善咎無可辭黑龍江將軍奕山著卽革職
留任仍責令將從前辦理含混之處辨明定議革職留任副
都統吉拉明阿著卽革任並著特普欽派員拏赴烏蘇里地方柳
號示眾以示懲儆○諭軍機大臣等特普欽等奏俄國人船欲赴
三姓等處貿易並木里斐岳幅隨帶兵船堅欲往烏蘇綏芬勘界
一摺此事貽誤根由總由奕山吉拉明阿於兩國公同管理一語
不能立時剖辨致令有所藉口本日明降諭旨將奕山革職暫留
本任並令特普欽將吉拉明阿拏赴烏蘇里地方枷號示眾矣特
普欽接到明發諭旨卽可宣示夷酋告以烏蘇里等處本非俄國
接壤又與海路不通奕山吉拉明阿已爲此事身獲重罪若再肆

意要求我等萬難應允前此奕山等將黑龍江左岸借給俄國人等居住大皇帝旣已加恩自不至有更改其未經議定之地任意闖越卽是背約豈有吉林地界轉以黑龍江官員言語爲憑之理爾卽馳往天津亦必仍交吉林定議以毫不相連之地何從勘界吉林官員斷不敢以此欺蒙君上爾亦身爲大臣豈有不明此理將來徒勞往返於事無益轉傷和好不如各守舊約早息此念兩國自此相安至阿勒楚克吉林三姓等處奕山條約內本無與通貿易之說尤當與之剖辨諒特普欽等必能悉心體會也本日明發諭旨卽著特普欽傳知奕山將此由五百里諭令知之○丙戌諭軍機大臣等本日據王慶雲奏謝恩請訓一摺該督擬於交卸後卽行啟程諒此次批摺發回必已就道兩廣總督見雖不兼海口欽差之任而夷人肇釁之端始於該省刻下省城尙未退還卽

始不至橫行終不能民夷浹洽一切控制機宜剛柔並用全賴該督妥爲籌辦上海互換和約尙無定局俟互換後一切應辦事宜必須豫爲布置黃宗漢在任年餘於夷務概置不問卽省城地方情形亦罕見奏及王慶雲到任後務與省城聲息相通卽有難於駕馭之處亦必設法維持至省城有夷酋雜處自難輕入其黃宗漢所駐之惠州是否扼要能否兼顧兩省著王慶雲悉心酌度擇要駐紮務與省城不至隔絕方爲妥善上年夷人有駕駛兵船前往廣西梧州之事東省並未阻止殊屬非是夷人條約尙未換定約內亦無駕駛兵船肆行內地之語以後如再有此等情事亟應飭屬阻止毋令習爲故常朕以王慶雲平日辦事精細心地和平必能馴擾外夷安定民心操縱得宜故特簡任是缺其如何妥爲籌辦之處俟該督具奏時朕必隨時指示不厭諄詳也至土匪滋

擾各屬據畢承昭奏稱黃宗漢已親往督剿而黃宗漢數月以來竟未入奏該督到任後如何調度自當陸續奏報卽西省軍情亦係該督兼轄設或兵力餉糈有需協濟之處亦應設法兼顧此則該督所能慮及無俟朕之諄諭矣勞崇光在廣西多年辦事實心不辭勞瘁未知其年力精神近來若何見在調任廣東更爲繁劇有無衰老情形並著王慶雲遇便具奏將此諭令知之○丁亥諭軍機大臣等本日據桂良等奏夷酋不遵開導堅欲北行一摺據稱英酋普魯斯佛酋布爾布薩到滬均不肯與桂良等相見但堅執進京換約之議決意北行米酋華若翰亦隨同前往又稱英夷兵船已有六隻於初九日開行其餘亦將陸續北駛本日已諭知桂良等卽行回京並傳諭文煜令其馳赴天津幫同恆福辦理各夷船隻如到天津海口著僧格林沁恆福卽遵前旨速派明幹委

員前往迎至攔江沙外向其曉諭告以桂良等在上海已有照會告知中國並無他意兵船萬不可駛入攔江沙見在大沽海口已節節設備如輕易入口恐致誤傷反失和好之道即將來進京時亦須由北塘行走至天津由水路進京並告以去歲天津所定和約均係桂良等一手經理此處無人深悉底裏即使剋期進京亦須等桂良等到京方能互換爲期亦不甚遠儻該酋不肯在攔江沙外靜候卽用內地船隻迎護由塘登陸至京卽著該酋在天津等候一切豫備館驛派人護送自當以禮相待仍與言明兩國既係和好互換和約不得隨帶兵船不得多帶從人其一切設備僧格林沁務當先行趕緊妥籌辦理至備辦館驛等事恆福卽與文煜商同妥辦可也將此由五百里諭令知之○諭勝保奏粵捻交警請撥天津馬隊助剿等語前因勝保等請撥馬隊諭令僧格林

沁於天津續調防兵內派撥黑龍江馬隊一千名前赴傳振邦軍營卽由傳振邦分出五百名派往勝保軍營聽候調遣此項官兵著勝保派員迎提藉資助剿至天長逆匪疊經官軍進剿獲勝而逆首陳玉城輒率大股回竄六合是賊蹤飄忽靡定極爲狡譎正應相機堵剿以遏兇鋒見在圍攻天長搶築礮臺並分兵斷賊外援自可迅圖克復若令賊以數千之眾牽掣我兵曠日持久轉恐墮其詭計著勝保一面督飭兵勇奮力進攻一面探訪賊蹤相機截擊毋使賊眾紛竄轉得肆其北犯至廬州賊匪旣欲糾約懷遠捻匪夾攻皖營則定遠情形倍形喫重勝保已撥馬隊三百名往援尙恐兵力單薄著翁同書妥爲布置不得稍有疏失仍著勝保隨時偵探悉心兼顧以免貽誤將此由六百里諭令知之○予安徽陣亡副將成興祭葬世職○戊子諭軍機大臣等僧格林沁等

奏夷船已抵海口擬俟三日派員前往曉諭一摺此次到津夷船止有四隻自係昨日桂良等所稱先行開駛之船其聲言尙有火輪船二十餘隻亦與桂良等探報相符惟當先爲曉諭使知天津設兵實因沿海重地恐有盜匪騷擾不能無此防備爾國亦當體諒我國不能因兩國和好卽爲撤防見在已准進京惟須等候大學士桂良等到後卽令由北塘行走由天津進京兩不相妨爾等可先至北塘停泊靜候公使如此開導如其肯往北塘卽著恆福派員彈壓如需淡水食物不妨官爲應付以示不疑俟桂良等到商議一切至海口木筏鐵箴等件既不能撤則米船出入亦不甚便著恆福飛咨山東巡撫如有續到米船令其暫在東境收口勿遽前進也將此由五百里諭知僧格林沁恆福並傳諭文煜知之○諭前因山東曹單一帶防堵喫緊諭令僧格林沁於天津防兵

內調撥吉林馬隊一千名交記名副都統德楞額管帶前往駐紮
見在粵捻各匪情形尚未稍鬆亟應厚集兵力以防北竄著成凱
桂成於綏遠歸化兩城備調天津防兵內各調撥五百名配齊軍
裝器械統交副都統桂成統帶迅速啟程馳赴山東曹州府單縣
一帶擇要駐紮並著會同德楞額籌商防堵機宜遇有賊蹤卽行
分投迎剿毋令闖入東境將此由六百里諭令知之○己丑以煜
綸錢寶青俱爲左副都御史

煜綸由太僕寺卿錢寶青由宗人府府丞遷

○庚寅諭內

閣前因江南文闈鄉試以軍務未竣兩次停止本年恩榜特開該
省督撫奏請用浙省文闈舉行該部議交浙江巡撫察看辦理旋
據胡興仁覆奏聲稱號舍不敷恐多窒礙等語朕以江南士子未
免向隅復諭令江南浙江各督撫妥爲籌畫茲據何桂清徐有壬
胡興仁會奏據稱咨商安徽學政該省距浙較遠賊氛未靖且歲

科兩試久停士子等未能一律應試擬分別辦理以昭慎重著照所請本年江蘇省鄉試卽定於十月內舉行借用浙江文闈辦理安徽省鄉試著俟該省平定地方較多應如何通融辦理之處由該督撫屆時奏請補行以示朕嘉惠士林至意○諭軍機大臣等官文奏探知湖南賊眾勢將入蜀請飭曾國藩帶兵迅赴夔州一摺逆首石達開竄擾湖南大股萃於祁陽與官軍相抗復分竄邵陽新化武岡等州縣據稱該逆蓄謀已久欲逞志於四川由湖南入蜀道路分歧若由資江沅江遽窺常澧則湖北荆宜兩郡皆危或由辰沅走秀山酉陽或由黔中假道皆可蔓延川境湖北水陸各軍全力施之皖省卽再分撥亦僅能近防洞庭常澧不能再顧西路詳覽該大臣所奏各情實爲通籌大局起見本日已諭令有鳳派兵扼要嚴防惟該省兵力恐不能當此悍賊曾國藩前派蕭

啟江帶兵援勦湖南見在湖南喫重此一軍自未能調回此外如江西湖北湖南四川等兵均素稱得力著曾國藩卽日統帶由楚江前赴四川夔州扼守以據兩湖上游之勢儻賊蹤竄至卽可有備無患至江西景德鎮之賊尙未剿平據官文奏請飭李定太守饒州饒廷選守撫州彭玉麟守九江著曾國藩斟酌情形咨商耆齡妥爲布置俾得迅掃賊氛不至顧此失彼將此由六百里諭令知之○諭官文奏密陳湖南賊勢恐蔓延入蜀並以保蜀應先據岷江必藉水師廠船方能得力請飭曾國藩督師由楚江到夔等語所籌不爲無見本日已諭曾國藩親率所部赴蜀惟曾國藩兵勇分踞各路能否卽到四川尙難豫定所有夔州正路宜先未雨綢繆至西秀一帶亦須添撥重兵以資守禦見在王慶雲計已卸篆赴粵有鳳兼署總督責無旁貸著卽趕緊布置扼守險要並隨

時偵探何路喫緊卽撥重兵前往以臻嚴密不得專待曾國藩客兵致有貽誤將此由六百里諭令知之○諭前因勝保等奏天長賊匪眾多諭令和春於張玉良熊天喜各軍內酌撥官兵前往勝保軍營會剿天長賊匪旋據和春奏天長之賊分股回竄六合已飭令張玉良等挑派馬步軍由儀徵相機進兵遙爲六合聲援本日又據勝保等奏進攻天長因兵單未能卽克儻賊眾傾巢大舉直向北犯關係甚爲緊要惟有竭力扼守盱眙請飭撥精兵數千名駐紮清淮一帶專防東北一面等語見勝保旣未能攻克天長不得不扼守盱眙防賊北竄蔣壩防兵甚單清淮亦屬可危必得江南撥兵迅速會克天長庶可杜賊北竄此時南北各軍統歸和春節制著該大臣仍遵前旨迅撥江北精兵前往天長會同勝保將該城剋期收復則清淮亦可無警而賊眾不得乘虛北竄矣將

此由六百里諭令知之○黑龍江副都統關保奏行抵鹿邑接收兵勇縷陳大略情形得旨汝係幫辦剿匪之大臣斷不准專顧豫疆一隅務須統籌全局視賊所向卽迅速追捕不可遲延○辛卯諭軍機大臣等僧格林沁等奏夷船陸續駛進海口遵旨曉諭情形並恆福片奏請飭明善來津等語此次該夷等爲換約而來雖陸續駛進海口經派員曉諭後尙未闌進鐵餞據稱普魯斯亦在攔江沙外停泊惟當加意嚴防不值與之用武致令藉口挑釁明善雖曾隨同桂良等赴滬究非上年天津原議之人一切機宜未必盡能洞澈本日據桂良等奏普魯等於本月十三日起碇赴津該大臣等亦於是日率同薛煥等馳驛回京但能少待時日卽可俟桂良等來津辦理僧格林沁等當告以桂良等回京消息令移泊北塘口外靜待經手人到互換和約如堅執不聽著妥爲開導

專令伊國換約之官員由北塘到津靜候並著恆福文煜與其約明不准隨帶多人執持軍械驚擾民人方合和好之意並告以議和並非用兵所有該國提督及帶來兵船均不可登岸庶彼此均可信心卽日文煜到津著卽赴北塘與普酋相見言明一切其由北塘到津夷官之館驛日用自應官爲給辦卽在外江停泊之提督等應需菜蔬食物等件亦當派員在彼一體酌給免致上岸滋擾價格林沁仍飭弁兵嚴守大沽海口勿遽開槍礮以顧大局將此由五百里諭知價格林沁恆福並傳諭文煜知之○諭張芾奏江西官軍與建德逆眾接仗失利退守彭澤請飭催江楚援兵會剿一摺皖南建德之賊糾眾竄偏下隅阪地方意圖西犯防守各軍接戰失利賊眾復撲牯牛嶺軍士傷折甚多普承堯一軍以待援不至退保彭澤其浮梁餘匪復窺伺婺源等處賊勢甚爲猖獗

不特徵境可虞卽江西九饒一帶亦恐賊蹤蔓延見在皖南旣無
軍可調而湖北各軍又因協剿湖南賊匪撥兵四出勢難兼顧江
西自應急籌援剿以固本省門戶著耆齡迅卽抽撥勁旅派委得
力將備管帶分駐東流湖口彭澤之間爲普承堯後路聲援以資
攻剿毋稍遲誤將此由六百里諭令知之○特普欽等奏四月二
十二等日俄國圖勒密夷目奇薩羅幅等分駕船隻抗行入口上
行攔阻不理並堅稱該國業經商妥差人進松花江貿易復有上
駛船隻聲稱赴興開湖往勘河源分界當向開導堅執不聽奏入
上命特普欽等據理剖辨嚴密防範○大學士翁心存因病乞
開缺允之○癸巳賂秉章奏逆首石達開分股出沒於永屬之甯
遠道州一帶散竄江華永明及廣西灌陽全州邊界冀以牽掣官
軍而其注意則在永屬之祁陽東安兩縣臬司劉長佑道員江忠

義等於三月十二日在永州續獲大勝後忽另股賊匪圍撲東安縣城四月二十二日用地雷轟陷署知縣李右文等均力戰遇害二十八日賊撲新甯城北之摩訶嶺都司徐良瑛等與江忠義內外夾擊斃悍賊百餘賊卽卻退散踞村莊江忠淑等潛赴村後縱火賊驚呼竄遁自相戕殺江忠義等追勦斃賊七八百名落澗死者無數救出被擄難民四百餘口城圍頓解三十日夜賊由東安棄城逃走另股撲寶慶武岡劉長佑等急起追之四月初三日行抵藍廟賊卽竄走副將李明惠等合勢衝殺立斃悍賊數百人生擒僞將軍僞總制及僞官十七名正法奪獲槍礮器械無算賊敗後邀洋田股匪會撲官營初五日戰於木山賊三萬餘偪攻營壘山谷皆滿劉長佑以八成隊出擊自辰至申鏖戰數時賊眾死傷相繼猶更番疊進不休劉長佑令畱營各勇均出隊衝殺賊卽乘

虛撲營官軍力不能支奪路突走營壘盡失賊旣敗劉長佑之軍知南路無官軍追剿遂併力以窺寶郡初八初九等日賊已擾及郡城南之黃塘經副將田興恕率遊擊田興奇等縱擊斃賊數百名十四日賊傾巢復至田興恕等截擊於七架坡後各營繼進追殺二十餘里計斃賊一千五百餘名生擒十一名奪獲馬三十餘匹槍械三百餘件十八日賊由貴山竄撲武岡州江忠義會同署知州汪敦灝等固守斃賊多名奪木梯二百餘架二十三日劉長佑等軍內外夾擊賊遂驚潰自相踐踏及溺斃者甚多由東北竄遁城圍立解維時另股分撲道州甯遠均經官紳擊退賊復繞全州界以入新甯劉長佑等擊之貴山殺五六百名生擒五十名其另股又竄至大飄坪劉長佑令劉坤一等七道並進賊陣大亂連斃一千四五百名割首級七百六十顆生擒百九十五名奪獲槍

械贏馬旗幟七百餘件二十六日賊由大飄坪竄出官軍截殺斃賊千餘割取首級七百五十顆生擒僞侍衛夏元有等三百餘名救出難民六百餘口奪獲旗幟擡槍七百餘件其新寨村之賊經劉長佑令各營排開槍礮賊眾驚擾夜半遁去官軍追至龍潭溺斃之賊無數復追過五里圳斃賊數千二十九日劉坤一等分勦新寨山塘之賊斬獲甚多合計斃賊一千二三百名查石逆分股繞由粵西陷東安連撲新甯縣武岡州官軍兩保危城數獲大勝惟劉長佑一軍自東安急援寶慶營壘全失咎無可辭姑念該員自回軍新甯後未及半月卽五獲大捷斃賊萬餘功過尙可相抵可否免其置議出自 天恩其在事出力之文武員弁及陣亡官兵應請飭部分別獎卹 上諭內閣逆首石達開竄偏祁陽等處自三月十四日至四月二十六等日疊經官軍截擊追勦轟斃殺

斃溺斃者不計其數見在賊勢已極窮蹙著駱秉章督飭諸軍分
路接捕毋畱餘孽候補按察使劉長佑先在木山失利自回軍新
甯後未及半月五獲大捷功過尙足相抵著加恩免其置議其江
忠義田興恕兩軍弁勇著駱秉章查明彙案保奏○駱秉章奏當
石達開陷桂陽嘉禾時已料其必竄永祁以取上游之勢衡州當
兩路之衝徵兵未集故飭劉長佑余星元楊恆升分道赴衡並令
中途遇賊卽擊石逆狡詐殊常此次賊目多係鹽販煙販會匪各
府縣山僻小徑皆其熟遊故賊蹤出沒多出意計之外自永祁大
捷後奸謀已阻石逆旣至祁陽令各股悍賊馳聘於楚粵之交勾
結兩廣各股土匪悉數竄入湖南會合其竄灌陽攻全州者均於
楚粵交界計誘官軍躡蹤追剿以便其深入之謀且招致粵匪以
張其紛紜之勢逆賊亦曾揚言回粵西老巢其實非勢極窮蹙必

不舍楚竄粵粵西屢經兵燹粵東偏近夷氛非賊所注意也見在大股均聚寶慶繞竄粵西邊界陳賴各首逆俱帶粵賊趨寶上年由福建竄去廣東之僞國宗陷嘉應州後又繞由仁化縣入楚晝夜急行已抵甯遠縣攻撲城池眾約二萬而英德巨匪號稱二十萬者已竄乳源勢亦駸駸入楚臣已調卽選道蕭啟江副將李輔朝知府陳士杰同知銜魏喻義各帶所部駐營柳州及宜章臨武邊界扼要嚴防又奏大股逆賊均竄寶慶南路蔓延東路西路且有漸偏北路之勢臣所調各路勇丁除郴宜臨武一路外盡派赴寶慶營頭太多必須遴員統領以專責成寶郡地居腹中路徑四通八達應分派統領兩員一勦東路一勦西路偏賊歸併南路然後合勢擊之方可杜其紛竄寶西一路當責之劉長佑而以田興恕副之寶東一路寶難其人聞按察使銜候選道李續宜有告假

暫歸之信

臣

擬俟其到籍卽派充寶東一路統領以一事權李續

宜見在鄂中統帶各營亦難久羈湘省特湘中軍務此時較鄂爲

急實非李續宜暫時統領不能收功已函商督

臣

及湖北撫

臣飭

令李續宜暫統寶東軍務如鄂省有警一檄馳來卽當趕赴鄂中

聽候調遣

上諭軍機大臣等前因逆匪竄近粵西諭令駱秉章

撥兵援應本日據該撫奏稱自石逆竄楚以來數省逆黨悉竄湖

南非勢極窮蹙未肯舍楚入粵廣西見可無須分兵往援等語逆

眾麇聚湖南則粵西情形較鬆此時自可無庸援剿儻該逆窮蹙

竄粵仍著撥兵追擊爲要再昨據官文奏稱探聞石逆圖竄四川

蓄謀已久或由資江沅江以窺常澧掠荆宜或由辰沅徑趨西秀

均應亟籌堵禦當已諭令有鳳於夔巫及秀山西陽等處派撥重

兵嚴密設防並諭令曾國藩卽統所部精銳由楚江直赴夔州安

籌防範矣逆賊竄擾數省所至糜爛若再令擾及蜀中則不獨財
阜之區悉遭蹂躪且勢踞湖北上游荆襄等處皆爲震動卽陝西
亦須設防大局將不可問著駱秉章悉心籌畫務於辰沅常澧等
處調派重兵嚴行扼截以杜賊眾西竄蜀川一路仍一面督飭弁
兵分投攻剿將匪黨次第殲除不可稍涉疏忽另片奏道員李續
宜卽可到籍擬令統帶寶東兵勇著照所請辦理將此由六百里
諭令知之○以捐輸軍餉永廣四川遂甯安岳學額各二名華陽
簡綿巴大竹內江南充岳池三臺中江蓬溪樂山宜賓珙瀘各一
名山東章邱四名○予湖南陣亡知縣李右長等祭葬世職○甲
午戶部議駁閩浙總督王懿德等奏請將洋藥進口徵收稅銀仍
歸地方官委員徵解得旨所駁甚是關稅抽釐原屬二事該督等
欲含混爲一並以稅則三十兩爲抽釐報數不獨以後抽多報少

徒飽私囊不能稽覈兼可冒銷前收之款爲調劑屬員起見殊屬

取巧過甚依議行○命賈楨爲大學士調許乃普爲吏部尙書以

張祥河爲工部尙書沈兆霖爲左都御史梁瀚爲戶部左侍郎

副都御史遷

○丙申諭內閣僧格林沁等奏查明接仗各情形一摺英

夷船隻不遵理論闖入內河於本月二十五日先行開礮官軍亦

開礮回擊該夷船隻受傷仍未肯退出並以步隊搦戰經官軍擊

斃數百名生擒二名餘俱逃散回船夷船入內河者共十三隻惟

一船逃出攔江沙外餘悉被礮擊傷不能駕駛該夷兵頭赫姓亦

被礮傷斃不能轉動該將弁等協力齊心大獲勝仗實屬異常奮

勇所有在事出力將弁兵勇著僧格林沁卽行查明保奏候朕施

恩並准其先於捐輸項下提銀五千兩分別獎賞○諭前據都察

院奏戶部郎中鐵錢局監督楊寶臣遞呈訐控戶部堂官一案當

派載垣彭蘊章秉公查辦茲據查訊覆奏鐵錢壅滯起自上年由於散放較多之故並非因本年四月戶部有減卯裁鑪之議所致至戶部奏稿係各堂官均畫亦非肅順一人獨畫該監督因所擬奏稿惠親王等未肯具奏仍堅執己見輒向都察院訐控堂官其所控情節皆屬懷疑揣度之詞毫無確據實屬膽大糊塗未便因其起念尙屬因公曲從寬宥楊寶臣著撤去鐵錢局監督仍交部議處以示懲儆○諭軍機大臣等僧格林沁等奏夷船先行開礮官軍擊毀夷船情形一摺夷人不遵理諭闖入內河向我礮臺先行開礮官軍憤怒列礮環攻將該夷船擊損多隻此係該夷自行起釁不得不示以兵威僧格林沁仍當嚴督將士妥爲防備撫局著責成恆福文煜妥爲辦理見雖用武著恆福等派委妥員或令天津道行文詰以既爲換約而來並已許其進京互換是中國已

屬盡情毫無他意何以反先行開礮肆行騷擾是伊先自背約並非我之無信儻有轉機卽可告以桂良等尙未到京伊等或在攔江沙外停泊或在天津等候總須桂良等到京後方可互換和約此次兵船接仗是否止係英人抑有佛米等國在內著僧格林沁等查探確實爲要北塘海口原設官兵前據該大臣奏稱移往他處此時旣已接仗則各海口均應嚴加防範著飭李志和仍統原帶各兵前往北塘駐守礮臺實力防堵惟不可先行開礮自我起釁違令者必治其罪將此由六百里諭知僧格林沁恆福並傳諭文煜知之○諭前因山東曹單一帶需兵防堵諭令成凱桂成於綏遠歸化兩城備調天津防兵內各調撥五百名馳往山東單縣一帶擇要駐紮茲據崇恩奏稱曹單民團甚多兵力已厚無須添兵等語著成凱桂成將前次調撥官兵配齊軍裝器械仍交桂成

管帶迅速啟程徑赴天津交僧格林沁調遣毋庸前往山東將此
由六百里諭令知之○予直隸天津陣亡提督史榮椿副將龍汝
元等祭葬世職死事地方及各原籍建祠○丁酉予安徽陣亡巡
檢費樾祭葬世職○戊戌恆福奏夷情難以就撫請派大員辦理
奉 上諭該督等有管轄地方之責不得置身事外所有防剿事
務責成僧格林沁其議撫事宜仍責成恆福督同文煜設法辦理
恆福經朕簡任總督受恩深重不得心存推諉致誤事機米佛兩
國既未隨同犯順卽著恆福督同文煜迅往北塘派員會晤或行
照會該二國盡心辦理以副朕懷○是月緩浙江甯海縣被擄地
方舊欠額賦